

Bosna i Hercegovina
Federacija Bosne i Hercegovine
Srednjobosanski Kanton/ Kanton Središnja Bosna
KANTONALNI SUD U NOVOM TRAVNIKU
Broj: 51 0 K 061678 21 Kž 3
Novi Travnik, 08.09.2021. godine

Kantonalnini sud u Novom Travniku, u vijeću sastavljenom od sudija Darmina Avdić kao predsjednik vijeća, Zuhdije Ćosić i Lazarele Porić, kao članova vijeća, uz sudjelovanje Slađane Dujo kao zapisničara, u krivičnom predmetu osuđenog I. B. zbog krivičnog djela Prevara iz člana 294. stav 2. Krivičnog zakona Federacije Bosne i Hercegovine i dr., radi donošenja odluke po žalbi osuđenog lično od 30.06.2021. godine, izjavljenoj protiv presude Općinskog suda u Travniku broj 51 0 K 061678 21 Kv 6 od 16.06.2021. godine, na sjednici vijeća održanoj dana 08.09.2021. godine, donio je sljedeće

RJEŠENJE

Žalba osuđenog I. B. se uvažava, ukida se presuda Općinskog suda u Travniku broj 51 0 K 061678 21 Kv 6 od 16.06.2021. godine i predmet vraća prvostepenom sudu na ponovni postupak.

Obrazloženje

Presudom Općinskog suda u Travniku broj 51 0 K 061678 21 Kv 6 od 16.06.2021. godine preinačene su u pogledu odluke o kazni pravomoćne presude tako što su uzete kao utvrđene kazne zatvora po presudama: Presuda Općinskog suda Travnik broj 51 0 K 061678 16 Kv 5 od 02.02.2017. godine jedinstvena kazna zatvora od 2 (dvije) godine i 9 (devet) mjeseci, Presuda Općinskog suda Zavidovići broj 42 0 K 016771 12 K od 30.01.2015. godine, kazna zatvora od 3 (tri) mjeseca i Presuda Općinskog suda Čapljina broj 53 0 K 070456 18 K od 21.12.2018. godine kazna zatvora od 6 (šest) mjeseci, pa je prvostepeni sud primjenom odredbi člana 340.a) Zakona o krivičnom postupku Federacije Bosne i Hercegovine (ZKP FBiH) u vezi sa članom 54. Krivičnog zakona Federacije Bosne i Hercegovine (KZ FBiH) istog osudio na jedinstvenu kaznu zatvora u trajanju od 3 (tri) godine i 5 (pet) mjeseci, u koju kaznu će se uračunati vrijeme provedeno na izdržavanju kazne zatvora po datim presudama.

Protiv ovog rješenja žalbu je izjavio osuđeni zbog, prema razlozima žalbe, pogrešno i nepotpuno utvrđenog činjeničnog stanja i pogrešne primjene Krivičnog zakona, s prijedlog da se žalba uvaži i pobijana presuda ukine.

Ovaj sud je ispitao pobijano rješenje u granicama žalbenih navoda, pa je odlučio kao u izreci, iz sljedećih razloga:

Iz obrazloženja pobijanog rješenja proizilazi da je osuđenik B. I. podnio prvostepenom sudu zahtjev za ponavljanje postupka uz molbu za izricanje jedinstvene kazne zatvora po više naprijed navedenih pravosnažnih presuda pošto

prilikom izricanja tih kazni nisu primijenjene odredbe o odmjeravanju jedinstvene kazne za djela u sticaju, kome zahtjevu je i udovoljeno na naprijed opisani način.

Pobijajući žalbom navedenu prvostepenu presudu osuđeni u izjavljenoj žalbi navodi da je on ranije podnio molbu za ujedinjenje kazni Općinskom sudu Čapljina za ujedinjenje kazni po pravomoćnim presudama Općinskog suda Čapljina broj 53 0 K 070456 18 K od 21.12.2018. godine, kazna zatvora od 6 (šest) mjeseci i Općinskog suda Zavidovići broj 42 0 K 016771 12 K od 30.01.2015. godine, kazna zatvora od 3 (tri) mjeseca, na koju molbu je dobio jedinstvenu kaznu zatvora u trajanju od 8 (osam) mjeseci, po presudi Općinskog suda Čapljina broj 53 0 K 070456 21 Kv od 30.04.2021. godine, koja je postala pravomoćna.

Ovakvi prigovori izjavljene žalbe su osnovani.

Budući da osuđenik u žalbi određeno i konkretno navodi spomenutu presudu Općinskog suda Čapljina o izricanju jedinstvene kazne zatvora, u kojoj je sadržana i presuda istog suda koja je sadržana i u pobijanoj presudi Općinskog suda u Travniku, takvim žalbenim prigovorima osuđenog dovedena je u pitanje zakonitost i pravilnost pobijane presude. Ovo zbog toga, jer kada bi ostala na snazi pobijana prvostepena presuda, a tvrdnje osuđenog iz žalbe se pokažu istinitim, pobijanom presudom prvostepenog suda došlo bi i do povrede Krivičnog zakona na štetu osuđenog.

Stoga je, na osnovu člana 337. stav 3. ZKP FBiH, ovaj sud donio rješenje kojim je žalbu osuđenog uvažio, pobijano rješenje ukinuo i predmet vratio prvostepenom sudu na ponovno odlučivanje kako bi se provjerili ovi podaci pribavljanjem informacija od Općinskog suda Čapljina, po potrebi poduzele i druge radnje u vidu traženja ispravke podnesene molbe od strane osuđenog, na koji način će prvostepeni sud biti u mogućnosti donijeti pravilnu i na zakonu osnovanu odluku.

Zapisničar,
Slađana Dujo,s.r.

Predsjednik vijeća,
Darmin Avdić,s.r.